



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma :

f Tir Yimym

ig tiryimym@aolima

yt tir yimym

TAPAK 3

## US ketdangsüri Niger mitkar den senden amen

## UCC anema Kerala CM-i assembly nung bangzüng ka benok



VOL. XX NO. 297 (ADOK 297) DIMAPUR RASEMNÜ (WEDNESDAY) LUROI (AUGUST) 09, 2023 ₹ 5.00

## BJP-i Kuki telungpur den tesentaktep mayu

**Guwahati, August 8, 2023 (Agencies):** 2017 nung Manipur assembly elections magidang Kuki nung telungpur telok shinga dena tesentaktep meyanglu ta Assam chief minister aser Northeast Democratic Alliance (NEDA) convenor Himanta Biswa Sarma-i ashi.

"Ni iba onük magizüker. 2018 nunga BJP-i iba mapa meinyak ta shiogo, saka nisungtemi onoki ashiba masü saka telungpur kati ashiba nung ang amanger. Parnok masü onok dak ang amangang" ta Sarma-i ashi.

Union Home Minister Amit Shah den Suspension of Operations (SoO) sign sütepa aliba Kuki nung telungpur telok kati 2019 kum shidi ka züluba nung "Assam CM Himanta Biswa Sarma aser Ram Madhav nati Manipur nung 2017 assembly elections mapang BJP-i takok angutsü atema Kuki telungpur teloktem teyari agi" ta shia liasi.

BJP-i 2017 kum mezung atema Manipur nung sorkar akümtsü takok nguteta liasi.

United Kuki Liberation Front (UKLF) nung chairman SS Haokip-i June 8, 2023 nü NIA court nung affidavit ka agütsüba nung iba shidi ya densema lir.

UKLF-i Centre sorkar den suspension of operations (SoO) sign sütepa lir.

2017 kum UKLF aser United People Front (UPF) ajanga BJP candidate tem takok ngudaktsü aser iba ya Ram Madhav aser Himanta Biswa Sarma na den tenangzüktep agiba ama liasi ta Haokip-i shidi nung shia lir.

"Manipur nung BJP-i aniba sorkar akümba nung ni tongtipang shilem ka agi. Onoki meyari asübo Manipur nung BJP-i aniba sorkar akümtsüji tamakoktsü. Takum parliamentary election nung BJP candidate-i onoki inyakba tesem nungi votes 80-90% angu" ta Haokip-isa ashi.

## Manipur raradak nungi Assam Rifles agiener

**Imphal, August 8, 2023 (Agencies):** Manipur kübok Bishnupur aser Churachandpur tsungda nisungtem raraba tesem nungi Assam Rifles agienogo.

August 3 nü Assam Rifles sepaitemi tetsür telok ka lungkak aيتدang injang khatokba aser tenük amdaktsüba mozü amshiba sülen tetsür teloktemi Manipur nungi Assam Rifles agientsü takhangba agüja lungkak ait.

"Tang nungi Manipur police aser CRPF ajanga Bishnupur nungi Kangvai lenmang nung aliba Moirang Lamkhai check post nung mapa inyaksü" ta Additional Director General of Manipur Police (Law and Order) L Lailun-i Hombarnü

metetdaktsü.

9 Assam Rifles melena Civil police aser CRPF (128 Battalion) ajanga Moirang Lamkhai nung aliba Naka/Check post nung mapa inyaksü, ta pai ashi.

Külen, Manipur Police-ia Assam Rifles anema FIR ka benokogo.

Assam Rifles-i Bishnupur district nung aliba Kwakta Gothol lenmang nung police garitem noktang ta FIR nung shia lir. Manipur police-i Pholjang lenmang leni Kuki telungpurtem bushitepa aodang 9th Assam Rifles ajanga parnok noktang aser iba ajanga Kuki telungpurtem jena odaktsü ta FIR nung shia lir.

## Nagaland arrtsü anasa Assam lanur ka pur ao

**Guwahati, August 8, 2023 (Agencies):** Assam kübok Golaghat nung alir lanur ka Nagaland nungi mejangia nisung kari pur ao.

Iba lendong ya Merapani nung Torani Indrapur anasa atalok aser lanurji Babu Gogoi ta jangjaogo.

Par kinungertemi iba tatalokba osang police nem sangoktsü aser pa kümzüksü atema maparen tenzüko.

Babu Gogoi ya kechi atema pur ao'ar memetet saka osang angazükba agi pai Nagaland nungi nisung kari den shiruru tepsetba atema mangatettep adoka raratep.

Nagaland nungi nisung kari Babu amak aser iba sülen pa pur ao ta osang angazüker saka police-i iba indang kuli kecha magütsü lir.

## CM Sarma-i ULFA (I) tanishir Baruah jaoker

**Guwahati, August 8, 2023 (Agencies):** Assam Chief Minister Himanta Biswa Sarma-i ULFA(I) chairman Paresh Baruah state nung arua amongtsü jaokogo.

Paresh Baruah-i Assam nung hopta ka arua amongtsü akok aser iba mapang pa nem timtem kecha magütsü ta CM Sarma-i ashi.

Baruah ya shisashir aser tazünger ka lir aser pai yimjung

olemtep alitsü mulunga agizüktsü imlar ta Sarma-isa ashi.

"Pai iba Assam nung anogo 7 among nungbo pai taoba Assam nungi tanü Assam tasen küma melenshiba angatetsü. Tanü Assam kanga junga melenshiogo" ta paisa shisem.

ULFA(I) nung adener nisung aika tanü temai adoknür aser parnok temai adokba nung yariteptsü, ta Sarma-isa metetdaktsü.

## FA nung ajemdaker Naga yimten latettsü akhanger: UNC

**Imphal, August 8, 2023 (Agencies):** United Naga Council (UNC)-i August 9, 2023 nü Manipur nung Naga nung aliba tesemtem nung Naga yimjung olemtep tembangtsü rongshia sentong agitsü tayongzüka agütsüogo.

Framework Agreement nung ajemdaker Centre-i Naga yimjung olemtep tembangtsü ta UNC-i takhangba agütsür.

Bodbornü Tamenglong, Senapati, Ukhrul aser Chandel district headquarters nung anepdang 10:00 ako nungi sentong tenzüksü ta UNC-i metetdaktsü.

"Naga yimten tebilemtsü atema tatemang lemtet ka magiba ajanga yimjung maparen nung tetsükdaktsü ajurutsü akok" ta parnoki ashi.

August 3, 2015 nü Centre aser NSCN(IM) tsungda Framework Agreement nung sign sütepa ajanga yimjung

maparen kanga ajangzüka liasü ta UNC-isa metetdaktsü.

**Naga Hoho aser NSF-ia pusema nungiter**

**Dimapur, August 8, 2023(TYO):** Naga Hoho-ia United Naga Council (UNC) pusema nungitba metetdaktsüogo.

"UNC-i Framework Agreement nung ajemdaker tatemang telemteba ka agitsü akhangba nung Naga Hoho-i pusema nungiter. Iba ya Naga nungeri putiotsü aser temetentem akangshitepa mapang tajung ka lir" ta President HK Zhimomi aser General Secretary K. Elu Nandang nati sangdong ka nung ashi.

"Naga nungeri kum aika yimten temeten bushia arudang aser maitsü jangjashitsü atema inyaka arudang tayongzüka jenti ajuruogo. Iba mangatettep asoshi Framework Agreement ajanga teimla ka agütsür anungji India

sorkari nangzüka ama inyaksü aser Indo-Naga maparen mapang matsülangtsüla" ta Naga Hoho-ia ashi.

"Naga yimten latetba ya Naga nungeri atema dang masü saka Northeast region ajunga atema tongtipang asütsü. Northeast nung teti atema yimjung aruba ajanga tajangzüka aika alitsü. Onok tangutsü tim yimten temeten atema kin/telok shinga nema tetsükdaktsü bentsür marudaktsütsü" ta parnokisa ashi.

Naga Students' Federation (NSF)-ia tanga sangdong ka nung United Naga Council (UNC) ajanga ayongzüka rally pusema nungitba metetdaktsüogo.

Iba mapang lemtet kar danga agitsü lira NSF tamendakdak anema süra onok lemtet nung madentsü ta President Kegwayhun Tep aser General Secretary Siipuni Ng Philo nati sangdong nung ashi.

## BJP MLA-i KPA MLA tem anentsü akhanger

**Imphal, August 8, 2023 (Agencies):** Manipur nung BJP MLA Rajkumar Imo Singh-i Kuki People's Alliance (KPA) MLA tem dang Manipur Legislative Assembly nungi anentsü tayongzüka agütsüogo.

"KPA MLA temi ketdangsubaren balaka meshir saka kasa mapang parnoki state sorkar nungi itasen meshia agir"

ta Rajkumar-i ashi.

"KPA-i Manipur nung BJP-i aniba sorkar nung madentsü ta imlaa liasü kechiyong parnoki Centre sorkar dang ketdangsubaren balaka meshia memorandum ka zülüogo" ta pai ashi.

"KPA-i sorkar nung madenba ajanga timtem kecha malitsü kechiyong KPA MLA ana

anenaka sorkar ket nung MLA 52 anungtsü" ta BJP MLA Rajkumar-i metetdaktsü.

"Iba ya MLA züngdangba indang masü saka Manipur nung tang tatalokba dak sendakba lir. Ketdangsubaren balaka meshia MLA ajaki Assembly-i arung aser kibong ka nung züngsem ka ama iba onük olemtepa tejakleni bener oang ta ayongzüker" ta paisa ashi.

## CS Alam-i campaign ana atema senden amen



**Dimapur, August 8, 2023 (DIPR):** Nagaland Chief Secretary, J. Alam IAS-i tanü Deputy Commissioner (DC) temi anir department balala nung ketdangsurtem den senden ka menogo.

Iba senden nung district ajak nungi DC tem aser Superintendent of Police (SP) tem den UD/MA/RD/IPR/YRS nungi district ketdangsurtem aden. Iba senden ya hybrid mode nung agia liasü.

Iba senden ya "Meri Maati Mera Desh" aser "Har Ghar Tiranga" campaign tem nung ajemdaker amen.

Chief Secretary Alam-i Nagaland nung alirtem dang

"Meri Maati Mera Desh" agitsü aser shilem agitsü metetdaktsü.

District Administration temi item sentong agiba kuli bendentsü atema public nungi teyari meshitsü atema pai tetuyuba agütsü.

Centre sorkari tetuyuba agütsüba ama asenoki iba campaign ya Nagaland nunga tiptema aser takok ngua agitsüla ta Alam-i senden nung adenertem dang ashi.

"Meri Maati Mera Desh" campaign nung tasürtem nem tetushi agüja yimtsüng aser jilatem nung nungshilung yanglutsü, linük wako atsüketsü, teka nung ali amer tezüngzüktep

agitsü aser lisopur süngdong 75 atemtsüba maparentem dena lir.

Iba campaign ya 'Azadi Ka Amrit Mahotsav' tembangba nungtem nung agir.

Lanur volunteers-i tesem balala nungi ali bendentsü aser ibaji Kartavya Path, New Delhi nung bener oa tatembangba sentong ka agitsü.

Iba campaign ya August 9 nungi 15 tashi village-level programs, August 16 nungi 20 tashi block-level & larger urban local bodies (ULBs), August 25, 2023 tashi nung state-level programs aser August 29 mesüra 30, 2023 nü New Delhi nung tatembangba sentong agitsü.

# 30 buba Mayangnokcha Award Trust senpet agutsüogo



Mayangnokcha Award Trust senpet agizükertem, tetushi tejaoker MLA & Advisor Wb.Temjenmenba aser MAT züngsempurtem külemi tangokba noksa.

**Mokokchung, Luroi/August 08 (TYO):** Mayangnokcha Award Trust (MAT) ajanga High School Leaving Certificate tatidang nung takok angur rongnungi tajungtibatem ishika shimteta senpet agutsü sentong 30 buba tanü Mokokchung Town Hall nung MLA & Advisor Wb.Temjenmenba tetushi tejaoker ka ama süa kanga dang mera ket keta kaogo.

Tanü iba sentong nung tetushi tejaoker MLA & Advisor Wb.Temjenmenba-i jembidang küm 29 tejaklen nübur ishikati timtem arema pei nüburtem tejakleni anitetsü

tangatetba nung iba MAT tenzüksüba ajanga tanü iba süngjang tajung aika tangogo, anungji parnok mapa tajung asoshi tenungsang agütsü tetemsü ta shia telok ajak noktaka teka malokja tenungsang agütsüba mapang agia liasü.

MLA Temjenmenba-isa Mayangnokcha-i pa inyakba mapa ajak nung kanga dang temolung agüja inyak, pa tesayur mapa inyakdang pa nem directorate nunga temaba menden nung amentsü asoshi maogka agütsü saka pai nüburtem meima tesayuba mapa dang inyak. Tanü putu nung

tazünger jenti certificate tajung dang bener lir, item nübu tajungtem jagi alimai aginüba ama inyaka litetsü nungtaker, ta sentong adenshia aliba kaketshirtem ajungshia ashi.

Tanü putu nung jokola Artificial Intelligence (AI) aruadokogo, AI ajanga mapa tajung aika inyaka otetsü akok, saka iba nungji ano tamajung densentsüa akok, anungji itemji bendangteta alima nung taso shia litetsüa chirapera-a alitsü nungtaker ta Temjenmenba-isa kaketshirtem ayongzüik.

MLA Temjenmenba ya Mayangnokcha-er semchir lir aser pai tanü sentong nung shilem

agia jembidang ya Mayangnokcha-er jakzüik nung pa ya mezüngbuba MAT sentong nung shilem agir ta ashi.

Temjenmenba-isa pa tanü politics nung shilem agia MLA menden nung amenbaji tebou Mayangnokcha-i jenjang ka renema toktsüba temoatsü ajanga lir ta kulisüa ashi.

Tanü iba sentong nung Dr.Sunep Imchen ajanga tarur pela-a agizükba den MAT nükjidong telok dang rateta lemsatapa liasü, NCRC Youth Department, Mk. ajanga MAT Naklo ken aten, iba den sentong nung Tsüngrem lenisüba jazüka Mokokchung Compound Baptist Arogo nung Christian Education Promoter Imyatelai sarasadem aser Straight Way Christian Mission Centre, Administrator Dr.Awala Temshi ketdangsüba nung iba sentong agia liasü.

### 2023 küm MAT senpet angurtem yamai liasü:

- 1. Khotolü Cürha**  
Mezhür Hr. Sec. School, Kohima  
Mayangnokcha Award for "Academic Excellence" the Overall Topper.
- 2. Zuluienla T Jamir**

Queen Mary Hr. Sec. School Mokokchung  
MAT-Rockdale Award for the Subject Topper in Ao (MIL)  
Rockdale Club Mokokchung.

**3. Khotolü Cürha**  
Mezhür Hr. Sec. School, Kohima  
MAT-YRSD for the Subject Topper in Social Sciences (Youth Resources & Sports Dept. Nagaland)

**4. Tsatanga Sangtam**  
Loyola Hr. Sec. School, Dimapur  
MAT-TY Award for the Subject Topper in Science (Tir Yimyim Daily Dimapur)

**5. Mulungsula Changkiri**  
Holy Cross Hr. Sec. School, Dimapur  
MAT EFoM Award for the Subject Topper in Mathematics (Education Forum of Mokokchung)

**6. Mulungsula Changkiri**  
Holy Cross Hr. Sec. School, Dimapur  
MAT-CECAward for the Subject Topper in English (CEC: C-Edge College Dimapur)

**7. Alui T**  
St. John's Hr. Sec. School, Tuensang  
MAT-Lenjeter Award for the Subject Topper in Environmental Education (Lenjeter An Ao Magazine)

## Shamator Town nung Metümnyo benjong mera keta amung

**Dimapur, Luroi/August 08 (TYO):** Shamator Town kübok public ground nung Yimkhiung kin Metümnyo benjong mera keta munga liasü.

Iba benjongmung sentong ya Beri Janger aser T. Hantsula lenisüba kübok agia liasü, kong STBC pastor, Rev. Thsankiu-i Tsüngrem temoatsü jazüka sarasadema liasü.

S.C Akhang, Head GB Shamator ajanga benjongmung

ratet indang jembidang, jenjang-menjang (millet) mezüng ruzükba temaitsü iba benjong amunger aser sobaliba aser tanüla tsütsüa kanga tongtipang, ta ashi.

YTC tir Throngso aser YYO tir Apong Janger nati tajungshi o jembidang iba benjongmung ajanga telongjem tali adokdaksütsü indang shia liasü.

Iba sentong nung tesemdanger tongti ka ama

Deputy Commissioner, Shamator, Chingyak Konyak-i jembidang, benjongbentsü ya Naga nunger ayak tongtipang ka lir aser Nagaland sorkari lisopur benjongbentsü temaba jenjangi ajungkettsü meranger, ta ashi.

Iba benjongmung nung 'Mongtsumong Cultural Troupe' aser 'Lunkheberu Cultural Troupe' ajanga sobaliba tsüngsang agi shilem agia liasü.

## Dimapur nung pre-paid power meter atema lemjem kati maruteter



Deputy Commissioner, Dimapur indang Conference Hall nung August 8, 2023 nü GB Union Dimapur aser DUCCF shisadokden senden ka DC Dimapur, Sachin Jaiswal IAS lenisüba kübok agidang tangokba noksa nung angur.

**Dimapur, Luroi/August 08 (TYO):** GB Union Dimapur aser DUCCF tsüngta 'revamped distribution sector scheme' dak sendakba nung shisadokden senden ka Deputy Commissioner, Dimapur indang Conference Hall nung August 8, 2023 nü mena liasü.

Iba senden nung menden ya Deputy Commissioner, Dimapur, Sachin Jaiswal IAS liasü aser pai züngsemtem pela agizükba den taoba senden nung jembiba lepa reprangshia liasü.

Er. Y.Akito Sema, EECE Dimapur Electrical Division

ajanga 'Revamped distribution sector scheme of government of India' indang nükjidong, iba scheme kübok smart prepaid metering inokba ajanga nüburtem ajanzüksüba indang rateta ashi.

Nüburtem aser talisa BPL section temi timtem balala ajuruba aser ken o tongtipang tem DUCCF tir Zasivikho Zakiesato ajanga lemsatapa liasü.

Pai Dimapur nung power agütsüba indang jenjang asadanga jembia liasü.

Pre-paid meter inokba ajanga

nüburtem timtem ajurutsü aliba indang pai lemsatapa aser Assam state nung consumer temi prepaid metre amenokba anema nokdakba indang jembia liasü.

Iba senden nung züngsem ajak nungi pei tebilemba aser metokmeperi lemsatapa liasü. DC Dimapur, Sachin Jaiswal-i nübur aser state ajanzüksü nükjidong nung sorkari scheme aser sentong tajung benokba kanga junga shisadangtsüla, ta ayongzüik.

Iba dak sendakba nung ano shisadokden senden maneni amentsü pangjemtepa liasü.



Aug 7 aonung tzunglu kanga sashia aser tanen makai aruba ajanga Mokokchung town kübok ward balala nung anentsüh tesem aika nung aluba osang angazüker. Artang ward ajangba Luke Sasong road (Artang lungren lento) nung anentsüh tulu alua lenmang anenbanger aliba district administration teyari ajanga concerned department-i oktokdang tangokba noksa nung angur. Majakong nunga ki ka kanga mejungi anener lendongbang nung aliba osang angazüker. Tang ya meyi mapang asünung, anentsüh kanga bulutsü, anungji, nüburtem kanga kümdangtsüla, ta sorkar ketdangsür ka den jembidang pai ashi. Mokokchung, 8th August, 2023



Tzunglu kanga sashia aruba ajanga Tzudikong Town nung NH-61 kübok 230/900 km nung tzü agi lenmang metenzüka orr aliba noksa ka yangi angur. Iba lenmang tekeraba nung yanglushitsü mechi tang nungi tenzüka tarutsü nung sangdong ka magütsü tashi iba lenmang nung gari tulu (heavy loaded trucks/vehicles) mesenzüi alitsü ADC Tuli, Shaying Sheu-i sangdong ka ajanga metetdaksüogo.

GOVERNMENT OF NAGALAND  
DIRECTORATE OF TECHNICAL EDUCATION  
NAGALAND: KOHIMA

No. DTE/MIN/4/2022/6

Kohima dated the 10th August, 2023

**PUBLIC NOTICE**

**Subject : Disbursement of Scholarship under the Scholarship Schemes of M/o Minority Affairs on National Scholarship Portal - Regarding re-validation of applications/ verification of SNO / DNO / INO/Hol/applicants for AY 2022-23: regarding**


In order to disburse the scholarship under scholarship schemes to the Ministry of Minority Affairs, the Government of India after considering the findings of the physical verification of Institutes/beneficiaries for academic year 2022-23, carried out by National Council of Applied Economic Research (NCAER) wherein various discrepancies in authenticity of institutes/ beneficiaries have been noticed. In this regard, it has decided to re-validate the applications and verification of Institute Nodal Officer /Head of the Institute/applicants by organizing special drive through Aadhar based bio-metric authentication.

1. In interest of prompt disbursement of Scholarship amount, applicants are suggested to make sure that the Aadhaar number provided is seeded with the Bank Account as the payment of Scholarships will be made through Aadhaar Based Payment System, only.
2. All concerned (Head of Institutes, Institute Nodal Officer and applicants) are therefore requested to observe the guidelines/instructions posted on NSP portal and ensure the updation of their Aadhaar in NSP portal before 10.08.2023 to facilitate smooth Aadhaar based authentication.
3. Head of the Institute and Institute Nodal Officer enrolled under National Scholarship Portal for Post-Matric & Merit-cum-Means based Scholarship are hereby directed to coordinate with the District Nodal Officer under District Education Office (DEO) of their respective District and authenticate their Bio-metric with immediate effect. Without which, verification of the application cannot be done at the Institute level. Institutes are also advised to authenticate the Bio-Metric of their student who are beneficiary of the scheme mentioned by coordinating with their respective District Education Office.
4. Beneficiaries of PMS & MCM scheme studying outside the State are directed to inquire from their respective Institute and enroll their Bio-Metric.
5. Institutes are advised to keep in touch with National Scholarship Portal/ dtenagaland.org.in for any update. For any assistance, query can be mailed to dtenagaland@gmail.com

(ER. VIPULHOU LHOUNGU)  
DIRECTOR

**KANGA DELABA LEMSATEPER**

Romans 14:7-8 "Kechiyong asenok shinga pei atema taküm malir aser pei atema masür. Kechiyong asenok taküm lira, asenok Kibuba atema taküm alir, aser asenok süra, asenok Kibuba meiyong"



Wb. K. Bendang Longchar  
13.05.1946 - 29.07.2023

Onoki teti meima aliba Kinungbo/Obala/Obu, Asür K. Bendang Longchar-i (Nokpu) toktsür aoba Kinungtsü/Chimur/Anükapang/Semchir aser Kinungertem ajaki, Obala asüdang (29.07.23) Ozü den ana aser talang nungi shirnokisa ozü asükhu lemsatepogo, nenok ajak den kanga pelaba lemsateper.

Ozü-i nenok temeim kodanga mamatoksü asen Kotaker tebu-i nenok ajak moajangma, ya ozü sarasadem. Amen.

Temeim Salem  
Mrs. Imlila Imchen, Chirnur, Anükapang,  
Semchir aser Kinungertem.

**Rahul Gandhi-i Aug 12 nü Wayanad semdangtsü**

**New Delhi, Luroi/August 8 (Agencies):** Parliament nung züngsem ka ama tanaben züngoksemshiba sülen tang mezüngbuba Congress lenir Rahul Gandhi-i August 12 aser 13 nü Wayanad semdangtsü, ta party general secretary KC Venugopal-i Mongolbarnü metetdaksü.

Gandhi ya Hombarnü Lok Sabha sekretariat-i MP ama tanaben züngoksemja liasü. Tenüing menüksüba ken o nung Supreme Court-i obendang agütsüba sülen anogo ishika lir pa tanaben MP kumogo.

"August 12 aser 13 nü @RahulGandhi-i pa indang constituency Wayanad semdangtsü. Democracy-i takok anguba aser parok ola tanaben Parliament-i meyipa aoba atema Wayanad nung alirtem kanga pelateper. Rahul

ya MP ka dang masü saka kibong nung züngsem ka lir," ta Congress general secretary KC Venugopal-i tweet asü.

Gujarat kübok Surat nung okadak kati anogo ana tejakdang pa küm ana tepuokdak ayutsü atema obendang agütsüba sülen Gandhi ya March 24 nü Lok Sabha MP ka ama disqualify sütsü.

July 7 nü Gujarat High Court-i pai mepeshiba magizük aser iba sülen pai July 15 nü SC nung ken o benoka liasü.

Kasa mapang nung Rahul Gandhi nem pa indang sorkar bungalow tejenba meyipa agütsüogo. Lok Sabha nungi disqualify sütsüba sülen Gandhi-i New Delhi nung pa indang 12, Tughlaq Lane bungalow ya April ita 12 nü toktsü aser tetsür Sonia

Gandhi'er kidangi ao 2004 küm Lok Sabha election nung Amethi nungi takok anguba sülen Kerala kübok Wayanad constituency nungi MP nem ya 12, Tughlak Lane nung sorkar bungalow agüja liasü.

"Hindustan nung aliba nüburtemi kü nem iba ki küm 19 atema agütsüogo. Ni parnok dang pelar. Tanü asüngbo ochi jembiba atema taa agütsütsüsa akümer. Taa kechi südir süang ni aotsü," ta pai April ita iba ki toktsüba sülen ashi.

July ita osang ka ajanga Gandhi-i par ki ya taoba Delhi chief minister Sheila Dixit'er kidangi belener aotsü ta metetdakja liasü. Congress MP aser Sheila Dixit'er jabaso Sandeep Dikshit na tang B2 Nizamuddin East nung iba kidang lidar.

**UCC anema Kerala CM-i assembly nung bangzüng ka benok**

**New Delhi, Luroi/August 8 (Agencies):** Kerala Chief Minister Pinarayi Vijayan-i Mongolbarnü state assembly nung BJP-i aniba Centre sorkari linük nung Uniform Civil Code (UCC) benoktsü atema sentong yanglur aliba anema bangzüng ka benokogo.

Chief Minister-i house nung bangzüng benokba sülen, Left sorkari jenjang agiba ya Congress-i aniba opposition UDF-i pelashishia agizükogo, aser amendment aser temelenshitsütem benoka liasü.

Chief Minister-i, Centre-i UCC benoktsü atema jenjang agiba ya Kerala Legislative Assembly-i süoki ia agir aser süngmanga bilemer, ta ashiba den iba jenjang agiba ya telok ka tebilemba dang aser kanga

aritepba telemtetba agiba inyakyim ka lir ta shisem.

State nung sorkar kümteter aliba party aser opposition UDF aser parnok den tamangba yimsü lokti tentet balalai UCC anema sentong balala ayongzüka agiba mapang CPI(M)-i aniba sorkari iba telemtetba agiogo.

Party anapronglai tawa UCC anema Kozhikode nung seminar balala ayongzüka agiogo, kong tamangba yimsü lokti tentet balala nungi lenirtemi shilem agia liasü.

Law Commission of India-i taoba ita, linük nung Uniform Civil Code UCC benoktsü sentong aliba dak sendaka nung nüburtemi parnok tebilemba balala lemsatepba benokba agizükogo.

**State 6 nung assembly menden 7 atema by polls Sept 5 nü agitsü: EC**

**New Delhi, Luroi/August 8 (Agencies):** Congress lenir tejen Oommen Chandy asüba ajanga menden tazüng akümba densema state trok nung assembly menden tenet atema Bypolls September 5 nü agitsü ta Election Commission-i Mongolbarnü metetdaksü. Vote tem September 8 nü azüngtsü.

Bypolls ya Tripura nung menden ana aser Kerala, Jharkhand, West Bengal, Uttar Pradesh, aser Uttarakhand nung menden kaka atema agitsü.

Jharkhand nung Dumri assembly menden atema by-election ya sitting MLA Jagarnath Mahto asüba sülen agitsüsa kumogo. Tripura

nunga sitting MLA Samsul Haque asüba aser Pratima Bhoumik-i mapa toktsüba ajanga Boxanagar aser Dhanpur menden atema election agitsü.

Kasa mapang nung MLA Bishnu Pada Ray asüba sülen West Bengal kübok Dhupguri assembly menden tazüng aküm aser Uttar Pradesh nung Ghosi assembly constituency menden ya SP nungi Dara Singh Chauhan-i party toktsür BJP nung oa adenba sülen tazüng kumogo.

Kerala nung Chandy ya Puthuppally menden nungi MLA liasü. Pa iba constituency nungi küm 50 dak tema nüburtem tenüing nung nokdakago.



August 8, 2023: New Delhi kübok Jantar Mantar nung Indian Youth Congress züngsemtemi Manipur nung mepetmesü, oset nung jenjang tali akümba aser mapang manguba anema longkak aiba noksa nung angur.



## TIR YIMYIM YIMOBILEM (EDITORIAL)

DIMAPUR RASEMNÜ, LUROI(AUGUST) 09, 2023

### Manipur nung Naga nung

**T**ang Manipur nung petsaperong adokba tialong nung tanü Manipur state kübok alir Naga nungertem ajak United Naga Council (UNC)-i anir pei pei district nung lokti senden lia Naga yimten tekaratiba nung latettsü asoshi center government dang nenshia metetdaksütsü sentong ayongzüka lir. Atangji, India government den Naga yimten temeten atema jembir tongti telok ana lir, kaji NSCN-IM aser kaji NNPGs aser UNC teloki India dang NSCN-IM telok den renemba " Framework Agreement" nung amendaker Naga yimten latettsü akanger. Atangji, Naga yimten nüchiso jenjang tashi metongtetaka, NSCN-IM telok o India government na tsüngda renemba 'Framework Agreement' nung amendaker Naga yimten jenjang ka latettsü asoshi tang ya mapang tajungtiba asütsü. Naga yimten tebilemstü tatem küma latettsüba nung ya nütsüng dang masü ali dena lir, anungji tang Naga nung aliba state-tem talisa Manipur nung Meitie nungertemi Naga nung aliba tesemtem ya Manipur state nungi razüka meyoktsü asoshi taküma tenlaa nokdang. Aji oda, küm ishika jakdang NSCN-IM o India government na tsüngda yimjung yangluba mapang, iba yimjung ya alima ajak nung asütsü ta lemtetba ken o anema Imphal nung 2001 küm June 18 nü Meitei nungertemi longkak aita government kiojen dena rongdokja inyakba anogo nung nisung 18 tashi taküm bendanga agüja inyakbaji Naga nung yimten nukjidong aser tejangraba anema liasü. Iba sülen nungi Manipur nung küm shia June 18 ya Manipur telongjem atema amungba anogo amaika bilemteta amonger. Atangji, iba amaji Naga yimten temeten aser tejangraba anema inyakbaji Manipur Legislative Assembly nung Naga nung tatartem aser UNC-i ola adoktsüba ser nung ola adokba mangashi. Ashiko, iba jagi Naga yimten tebilemstü ya tang tashi telemtetba kati maruteti atsülanger asütsü akok, kechiyong Imphal lenden nung aliba Manipur nungertemi NSCN-IM aser India government na tsüngda yimjung ken o latetba anema nisung taküm tashi agüja nokdakaka Manipur nung alir Naga nungertemi ola madoker aser ola madokba tetezüji tangari inyakbaji shitak ta ashir amai angateter. Aji oda, tanga May 3 nü Naga nung o Kuki nung na külem ser Meitei nungertemi ST jenjang meshiba anema lokti senden ayongzüka anogo nung lendong atalok ser nung kechikomaka ser Kuki nung o Meitei nung na rara kümogo. Iba rara ajanga Kuki nung Imphal nung azü jang kata melitetsüsa kümogo aser tetsüba agi Kuki nung MLA-tembo tatar sendenia maotsü lemtetogo. Atangji, Manipur tatar senden ayongzükbaji Kuki nungertemi parnoka Manipur nungi razüka yimten balaka akümstü akangba anema dang masü saka Naga nungertemia Manipur state nungi razüka oa Naga yimten telemtetba ka agitsü tsübuba agi, itemji nokdanga yimten telemtetba akangshitsü jateper. Ibaji meteta Manipur nung Naga nung MLA-tema tan jatepba Manipur Legislative Assembly nung madentsüla ta UNC-i metetdaksüogo. Aji oda, külen Naga nungertemi Manipur nungi razüka onür aser ano külen Kuki nungertemia Manipur kübokbo melitetsü ta akanger ta süra kangshia lidaktsütsü masüji, center government-ia telemtetba tasen ka agitsüsa akümstü. Iba ama tensa mapang ka nung ya, talisa, Manipur nung alir Naga nungertemi yimten tangatetba tejangja ka sayutsü nungdaker. Atangji, Manipur nung atalokba yimten tebilemstü ya kanga tebenja lir, kechiyong tongti kin asem Meitie, Naga aser Kuki nungertem rongnung ya kin anata putepa mali. Aji oda, Meitei nungertemi Kuki aser Naga nungertem yimten temeten aser tejangraba anema nokdaker, ano külen Naga nungertem o Kuki nungertem na tsüngda ali tsütsü tsükchitep adoker. Ajangla, item kin asemji kodaser state ka kübok litettsü ? Iba tensa tiaji kodang jungjunga repringdangdir, joko Manipur state agi Union Territory asem küma aotsü ana nung lir amai repringteter. Iba amaji ataloktsü asoshi tang ya Manipur nung Kuki nung o Naga nung na tsüngda taidokteper yimjung nung tangatettep kati arutsü kanga nungdaka kümogo. Aji oda, Manipur nung alir Naga nungertem asoshia Manipur state nungi razüka orr Union Territory ama jenjang ka ngutetra, aji yimten nüchiso anasai arur asütsü.

## OLEMSABANG

### "ONLINE SHOPPING" TEPILEMSTÜ

~ N. I. Yanger

COVID-19 pandemic ajanga National Lockdown matalokdang nungi Online shopping otsüsa angashia aruogo.

Iba sülen nungtoagi asenoki joko tezübaba (hobita) apia mela-melaa dang online nung pei taginüba oset kechi lir, itemji order asütsü, anogo ishika lir asen ki bushia bentsür arutsü. Angazükba agi Online shopping Sites aika dang lir aser item sites nung anguba osettsüsetji züngdangra mezüngdangmatsü, oda crore-sa aika lir ta ashir. Mobile nung temeyong agi dang nemshi nung(just a clic away) account nung sen dang lira, süoshi nungi shir ki osettsüset, yinsang yinri, oda nai dang kechi nemshidir ibaji nür kishizüng tashi bentsür arutsüba putu ka nung alir. Iba inyakyim ya taka taiter tem, mapa tajung nung alirtem atemabo kangarasa "hobita". Saka parnok jilu ajizüka asen ama tepetzük kibong temia iba ya kanga sabua, talisa kiyim lanutsürtemi inyaktepyaa angur. Tanü asenok rongnunga kibong kar nungbo kinungpu hajera ao nungang chipo tongdaktsüba sürnung kinungtsüi taginütsü osettsüset order süa yur tagizüktsü sen maka, tangar dang tetemlok nung sen apua, kibong telungi aluba ngua arudar. Oda karbo joko "rakhi" kümer, "Compulsive Online Shoppers" ta ajatsü langa, yimya süpaa kümoko. Asenok meimchir dak yimya ka alibaji, menüngdaktonga tenük agi rüshiba ajak aginer, saka tang aliba asen lima rongsen-kütsüng tia agi ibaji memelar. Oda asen tang kechi nungdak itemji dang lira teperi ta alitsü tim. Alima nungji tayokertemibo tesüngmangtsü tobour junga mesüzüktsü(advertise), saka asen menüngdakra, otsüla/oboula nungeri "Tzümari scü pezük masen" ta jembia arubato pilemteta, mangu amai doktsütsüla.

### OSANGTSÜSANG TONGTEPRATEP (MEDIA) YA KANGA KÜMDANGA AMSHITSÜLA

~ L. Kika Pongener.

*(Yashi adok nungi...)*

Ano tanü putu nung yimtsür-yimer, kin kidong, zünger, telok-tentet shia nung WhatsApp Group tenteta yua lir, aser ibaji ajanga osangtsüsang yak-yakta metetpela-a tongteprateper, kati ka ajungshitepa mapa tajung aika inyakteter. Ano telok külemi ajurutepa lemsatepsüba mapang madoktetba ken o aika mela-mela tongtepratepa telemtetba agir. Anungji iba Social Media ajanga rongsen aser mapanga jenti kümzüker. Ajisuaka, aiben asenoki asen telokpur (Group) nungdakba dak alaka, tangar kin indang aser tangar telok indang tatalokba otsü/osangtem, asenokbo menungdak sernung, mashi-mashi yokba ajanga tangar kin aser tangar telok den ken o menatsüsa-ka mapang kar nungbo ajurutsü akok. Kechiyong tanü putu ya kin tanak-temesung ajunga meyoktepa külemi sendaktepa libaliroba, kiba-lempuba lima ka küma-adok nungji, pei telok, pei yimer kisung masü asen den kibalembua alir tangar yimer/kin ajaki asen sasep nung perokshiba osangtsüsangji ngudar/züngdar ta metettsüla. Anungji akokba tashi pei telok asoshi nungdakba osangtsüsang dak alaka, tangar indangbo meyokba tajungba asütsü. Anungji Administrator-i koba yoktsüla aser koba meyoktsüla itemji kümdanga repringa acha-ayangtsüla.

Ano aikati tatalokba osangtem perokshidang noksa tamajung maksutsü noksatem, tatishitsü....Nisung kar manglong/mangsa pei miim oset (Private parts) ajunga ngua/sayua, yamala noksatem perokshiba aser nuktapangda/japojari maksutsü mapa benshiba noksatem (Videos) yamala 'Social Media' nung mekümdangi yokba ajanga lokti nung aser kibongtem dangi maksu bentsür arur, talisa, tanürtem dang lesson tamajung sayur, anungji yamalaji kanga kümdangtsüla. Ano kanga tongtipang kaji, nisung tepsetba, lendong (Accident) tulu atalokba kar nung, zübo tulu keta yiro-yipongba, tatishitsü....Tetsüng-teben kanga mejungi kosukba, tekolak o temang balala pilaba, tepok tar ajunga sazüka alua/peliteta yiroba, etc. yamala noksatembo meyokang tajungba asütsü, kechiyong yamala noksaji ngur, temulongjang tashitak keta alir (Heart Patient) karbo lendong ataloktsü kecha meteta maka, mesura ashiko, karbo pei sosem adianu kar asünungbo, ibala noksaji ngur 'Heart attack' asütsüa kecha meteta maka. Ano küsa tatalokba noksa ka nisung asem-pezüi aiben dang (Repeat) yokba-a mapang kar nungbo angur. Anungji tangari yoka lira küsa noksaji aiben meyoktsüla, akok tashi Administrator-i itemji kanga junga repringtsüla. Aji oda, Social Media ya tajangzüka aika dang lir, saka lendonga keta lir ta asenok ajaki metetdi aser kümdanga amshidi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Texas pastor Phillip Loveday samar anogo pongu jungogo



Pastor Phillip Loveday

**Freer, Luroi/August 08 (Agencies):** Arishi küm 47 tain Texas pastor Phillip Loveday ya oil and gas company Kinder Morgan nung secular mapa inyaka liasü aser pa kidang nungi mapai orr anogo pongu junger meyipa meshilanger aser iba sülen pai kinunger shinga dena osang magitep, anungji Hombarña pa bushia liasü.

Freer, Texas nung aliba Faith Christian Center nung senior pastor inyaksang Loveday ya August 2, 2023 anepdang 9:30 ako meta mapai ao, ta Corpus Christi Police Department ajanga Facebook nung sangdong ka nung ashi. Pa kinungtsü Melea Loveday dang nisung kati phone nungi pa mapaia maru mesüra tekülem kidangia maru ta ashiba sülen lai police dang shisaboluba lemsatep.

Loveday'er kinunger temi KRIS 6 dang ashiba agi, pa kidang nungi ayazükba anogo pa indang phone kidang yutsür

ao saka yamaji kecha meblem, kechiaser pai kinungertem den jembitsü lenmang kabosa ngutettsü saka yamaji masü.

"Pai phone langzüksübas, anungji yangji tera temolung malentsüka lir. Pai kodanga phone magizüki meliasü mesüra pai mapang shidak nung magizükra 'call back' asü," ta Loveday'er jala tantsüla Kayleigh Purnell-i ashi.

Pastor Loveday ya tar feet 5 aser inches 11 talang, temang tuozük pounds 200 shi aser kou temoro aser tenük sentsü tanen lir ta ashir.

Par arogoia Finding Phillip Loveday ta nungja agütsür Facebook page ka lapoka lir, kong Hombarnep tashinung follower 8,000 dak tema liasü aser nisung ajak dang Loveday bushiba nung shilem agitsü ajungshia liasü.

"Onoki maneni bushir aser nenok danga bushitsü ajungshir! Shirnokisa pei indang ki o jen nung bushiogo, nenok ajak dang

pelar. Onoki bushir alidaka imlibilema nenoki maneni bushiang. Asüng lenmang kabo angutsü imlar. Phillip meyiba shilangtsü aser par kibong asoshi maneni sarasademjang," ta iba Facebook page ketdangsüri Deobar aonung sangdonga liasü.

Tebo ya gari lendong kar ajurua tesem kar nungi maruteti/marakzüteti alitsü südi, ta Purnell-i ashi.

"Pa odangbo mesamatsü. Pa ya gari lendong ajurua tesem kar nung meküpoka alitsü amai bilemer. Texas ya kanga tatsük aser pa kima mapa inyakang langka kar nung melepok mesüra yirur teyari monguteti alitsü akok," ta lai ashi.

Faith Christian Center Church züngsemtemi KRIS 6 dang ashiba agi, Loveday ya tekülem kidang Bodhbarnü sayutsüngitsü liasü aser pa maruba ajanga parnoki pa atema sarasademtsü.

"Pa ajanga onok tamang tali akangshia liasü. Onok tanüla nung yirudang pa yiru. Pa onok sannüker liasü aser tang onok sannüker maliba san telok ka lir," ta arogo züngsem Emily Massey-i ashi.

Pastor Loveday samaaka tang tashi pa dak tim masüba mapa inyakba kecha monguteter, ta CCPD nung public information officer Travis Pace-i KRIS 6 dang ashi.

"Pa dak tim masüba mapa inyakba kecha majiteter. Ajisüaka yangi aser pa mapa inyakba tesem tetsüngta tuluka lir, anungji ashitsü tasak," ta pai ashi.

# Texas nung tekülem ki raksatsüba mechi nisung ka apu



Isaac Jordan Soto-Olivarez

**El Paso, Luroi/August 08 (Agencies):** Nisung kati Texas nung tekülem ki ka nung satanic symbols inokja sen \$4,000 dak tema indang raksatsüba mechi apu, ta yangji aliba ketdangsür temi ashi.

July 17 nü Most Holy Trinity Catholic Church raksatsüba mechi arishi küm 27 tain Isaac Jordan Soto-Olivarez apu, ta El Paso Police Department ajanga ashi.

Ketdangsür temi ashiba agi, Soto-Olivarez-i tekülem ki

kakpoka ai aser temeshi totzü (holy oil) inshitsü aser kangki tem langkoshishi yutsü aser tesem balala nung "666" zülüja liasü.

Soto-Olivarez-i tekülem kidang oset balala nung teka sangshiba ya video surveillance footage nung angu aser pai Most Holy Trinity nung sen \$4,100 jenjang raksatsü, ta El Paso ketdangsür temi ashi.

Soto-Olivarez apuba sülen El Paso County Detention Facility nung yua lir. Pai Burglary of

Building, Criminal Mischief Damage / Destruction to Place of Worship, aser aputsü merangba nungi jenshia senzüba atema ken o ka-ka benoka lir.

El Paso ketdangsürtem den külemi temolung melemi alisang aputsü merangba nung Federal Bureau of Investigation indang West Texas Border Corruption Task Force-ia shilem agia liasü.

Catholic Diocese of El Paso ajanga taoba hopta sangdong ka agütsüba nung yangji aliba ketdangsür aser FBI dang pelaba lemsatepa liasü.

"Hopta ana jakdang tekülem ki tera raksatsüba mürektetogo aser iba atema kanga pelar," ta iba arogoi ashi.

"Most Holy Trinity Catholic Church lapoka lir aser akhi ama tekülem sentong metitemi agir. Ozüng amshir aser mapa tamajung inyaker aser Most Holy Trinity arogopur asohi maneni sarasademtsü ayongzükter."

Tekülem ki nung teka sangshiba osang ya July 17 nikonngang Most Holy Trinity indang Facebook page nung sangdonga liasü.

# ANOGO ABEN TSÜNGREM DEN

## Asenok Tsükchir Dang Inyakba Mathi 4: 1-11

Asenoki zübazüba agiba mesüra mapang- mapang nung Satan tsütsü bilemba yimya paidoktsüla. Meimchiri ajangshiba ajak nung Khristan ka asoshi Yisui bilemba aser mapaji tabensa ta bilemetsüla. Anungji Pai tsükchir dang inyakba asenoki zünga alitsüla.

Mapa kaji, Satanji shidakba lir ta Yisui kümdanga liasü. Pai tamajungji temulung nung bilemba temenen ka dang sayutsü kodanga memerang. Asenoki taküm nung takok ngunera, asenoki Yisui ama tajung tashi kobai Tsüngrem den tesendaktep raksatsütsü meranger aser asenoki asen kümzüksang tenzüksü merangba menentsür, iba tashi tamajung aliba meteta notaktsüla.

Jangjangjaa, Yisui Satan arütsü aser Pa taküm nungi oadokang ta ozüng agütsü. Masterbai asenok asoshi kasaji inyaktsü. Satan tekülak aser pa tasa tamajung asen tebilemba dangi aruba metettangyongi, asenoki Michael Archangeli sangdongba tashi tait tesangdongba sangdongtsüla - saka kotak tenyar tuluba Michaeli... Tsüngremi na arüjang (Yihuda t.9).

Sarasadem: O Israel Sannüker, na shiba Cherubim madak amener, sentsüwangshiang. T.Ken 80:1.

Tenangzükba: Saka nenok Kü tenüng akhümtsüburtem asoshi temeshiba anü Pa tashikang nung tanebtsü bener adoktsü. Malaki 4:2.

# Tennis asayar Coco Gauff-i Tsüngrem aser arogo nem tenüngsang agütsü



Coco Gauff

**Luroi/August 08, 2023 (Agencies):** Taoba ita Wimbledon mezüngbuba round nung tamakok ajuruaka Deobarnü Mubadala Citi DC Open tetsür kija tennis asayamung final nung takok anguba atema America tsür arishi küm 19 tain tennis asayar Coco Gauff-i yimjak nung Tsüngrem aser lar arogo nem tenüngsang agüja liasü, shibai Greek tsür World No. 9 Maria Sakkari madak 6-2, 6-3 agi takok ngua liasü.

"Iba takok atema ni mezüngbuba nung kübo Tsüngrem dang pelaba shiner. Wimbledon mezüng round nung tamakok ajuruba sülen kanga jashia liasü. Ozü arogopuri kanga sarasademtsü aser yari. Anungji nenok ajak dang pelar," ta lai ashi.

Gauff ya Boynton Beach, Florida nung aliba Saint John Missionary Baptist Church züngsem lir, aser taoba mapanga la takum nung la tamang aser arogo kanga

tongtipang lir ta shia liasü.

New York Times Magazine nung Gauff-i tebo Corey Gauff indang jembidang, asaya shia asaya metenzükdang par jala aser la den asayatsü alila atema sarasademtsü, ta ashi.

Asaya result mechi sarasadem ka amajok kumsütsüji tamachi lir, ta lai ashi.

2019 küm Wimbledon otsü nung asayar tanutsütila akumba sülen Gauff ya alimai metet, shibai iba asayamung ponguben kokteta alila Venus William madak first-round match nung takok ngua liasü aser iba mapanga lai Tsüngrem nem tenüngsang agüja liasü.

"Ni arishi küm ti asüngdang nungi asaya tenzüksü lia kübo küna külemi sarasadem asü. Künati takok atema masü saka ni aser kü den asayatsü alir takum kumzüksü asoshi sarasadem. Asaya sülen ni Tsüngrem nem iba maongka asoshi tenüngsang agüja liasü," ta Gauff-i New York Times Magazine dang ashi.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rongnentsü**

(n) rong sota ayuba, atsüita ayuba (anchor)

\* Tzüyim tulu nung senzüba rong shia nung **rongnentsü** lir.

**Rongniba**

(n) rong anishir (navigator of a ship)

\* Tzüyim nung **rongniba** nisungji kanga tasü tait.

**OLONG PAITEP # 6601**

1			2		3		4		5
6		7							
					8				
9				10					
							11		
			12						13
	14								15
					16				
			17						
								18	
19									

**TIPLÉN**

- 2. Teburtemi tejak nung awaba - (8)
- 6. T \_ \_ \_ em - (3)
- 8. Tzüak ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

**LANGTSÜNGLEN**

- 1. Temejangdak - (6)
- 3. Nisung ka mapa inyaktü nüba - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

**OLONG PAITEP # 6600 TELANGZÜBA**

**TIPLÉN :**

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola, 1
- 6. Talak, 17. Mazük.

**LANGTSÜNGLEN :**

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.



**ANEMSÜJI SHIRNOK ?**

*Devotional sentep tenzüksü lia kiralongrar nisung ana, overcoat kaka semer, mask agir, süpok nungji teka amouker, tena rongnung ka kilongi ait aser kaji kishizüing nung nokdaker, prangpong atsüteter ayimoktsür.*

**Kiralongrar** : Shibasa nenoki amangba Yisu mech nung injang kaka chiner pei menden nungji mena ataa liang, shirnoki injang mechner pakzüka luang. Tenlakidang alirtemto, tamasa deacontem, iba sülen choirtem, mapangsertem, kiyim lanur/lanutsürtem kaka pakzüka luma. Tatem nung Pastorba, Tesayula, tamangtir ishika, parnok nisung metsü shi anüing.

**Kiralongrar** : (mask agizüker)Küna ya kiralongrar masü saka asen yimertem rongnung shibasa anemsü tamanger, aji metettsü atema inyakerba dang, taji joko sentepji tenzü kang, Pastorba.

~ Lilir : WhatsApp

**Assam college principal temi ABVP nung adenba aitsür**



Assam nung college principal asemi Akhil Bhartiya Vidya Parishad (ABVP) nung züingsem akümba mapang agiba noksa angur.

**Guwahati, August 8, 2023**

(Agencies): Assam college asem nung principal inyaker temi Akhil Bhartiya Vidya Parishad (ABVP) nung züingsem akümba atema ashishitep ken o ka adokogo.

ABVP ya Rashtriya Swayamsevak Sangh (RSS) indang kaketshirtem kongsang lir.

JB College Jorhat, North Lakhimpur College aser Gurucharan College Silchar nungi principal inyaker nisung asemi Deobarnü ABVP nung denogo ta parnoki metetdaksü.

Iba inyakyim ya political party tem aser kaketshir teloktemi aitsür.

"Principal temi ABVP nung züingsemsü lemtetba ya kanga dang süoki ia bilemtsüba onük ka lir aser iba ajanga college tem

nung academic maparen nung timtem adoktsü" ta Sivasagar MLA aser Rajgor Dal tanishir Akhil Gogoi-i ashi.

"Kodaser shisaliok rejutem nung principal temi political telok ka nung adener? Iba ya tim masüba inyakyim ka lir" ta pai ashi.

"Principal temi kaketshir tentet ka nung züingsem akümba sülen kaketshirtemi parnok dang nungi temeten angutsü imlatsü asü?" ta Gogoi-isa asüngdang.

Anogo ishika tejakdang Bhawanipur Anchalik College principal Dr. Mukunda Sharma-i constituency lemsashiba anema lungkak aitba sentong ka nung adenba atema mapa nungi anenja liasü ta pai ashi.

"Onoki iba anema noktak.

Tang principal asemi political party ka indang kaketshir telok nung züingsemba atema temerenshi alitsü malitsü? Iba kaketshir telok yagi telemsa adoktsüba aser Hindu-Muslim politics inyaker" ta Akhil Gogoi-isa metetdaksü.

Külen, Assam Trinamool Youth Congress president Bandip Dutta-ia "principal temi political party ka nung adenba ya magizüker" ta metetdaksüog.

"Iba ya tiyongtsü nung inyaksangshiba anema lir aser shisaliok rejutem nung principal tem ya tiyongtsü nung inyaker tem asütsüla" ta Dutta-isa ashi.

Ajisüaka, ABVP-ibo principal temi telok mashi ka nung adentsü temeten lir ta metetdaksüog.

**Assam DGP GP Singh-i Centre nung DG inyaktü**

**Guwahati, August 8, 2023**

(Agencies): Centre sorkari Assam Police nung Director General of Police (DGP) GP Singh, IPS DG/DG Eq. menden nung ajungketogo.

Appointments Committee of the Cabinet ajanga Centre nung mapa inyaktü atema IPS kettangsur 14 shimteta liasü.

GP Singh-i taküm January 31 nungi Assam Director General of

Police (DGP) inyaker. Pai Bhaskar Jyoti Mahanta melenzüik.

Assam DGP inyaktü shimba sülen GP Singh-i Assam Chief Minister Himanta Biswa Sarma dang pelaba metetdaksü liasü.

GP Singh ya Assam-Meghalaya cadre nungi 1991-batch IPS kettangsur ka lir aser pai küm 6 tashi National Investigating Agency (NIA) nung

inyak aser northeast kübok tesem balala nung inyaka aruogo.

Assam nung tensa mejungi akümba sülen GP Singh ya pa indang parent cadre nung inyaktü atema yok ta osang ajanga ashir.

NIA nung inyaktü GP Singh-i Jammu and Kashmir, Northeastern region aser Punjab nung telungpur dak sendakba ken o aika nung inyaksema aruogo.

**Mizoram nung tzümetsüing ajanga kibong 80 tema anien**



**Aizawl, August 8, 2023**

(Agencies): Mizoram kübok Lawngtlai district aser Lunglei district ana nung tzümetsüing timtem ajanga kibong 80 tema pei talidak nungi anienogo.

Tlabung town aser iba meketa aliba yimtsüing ana nungi kibong 40 tashi Khawthlangtuipui ayong nung tzü talila ayimba ajanga anienogo ta Tlabung nung kettangsur kati ashi.

Tesüba anogo pezü tashi

Tlabung nung tzüinglu kanga arur aser iba ajanga tzümetsüing timtem ajurua lir ta paisa ashi.

Hombar nikongdang tashi nung tzü teimba aküm aser ki aika metsüingbangogo ta kettangsurisa ashi.

Iba jagi Tlabung nung tzümetsüing agi kongshiba kibongtem trade facilitation centre, school aser community hall nung jenoka lir ta paisa shisem.

Young Mizo Association (YMA) kettangpurtem aser volunteers ajanga rescue operations inyaker.

Lawngtlai district kübok Chawngte nunga kibong 45 tashi tzümetsüing timtem ajanga anienogo.

District administration-i tensa jungjunga repringdar aser timtem ajuruba kibongtem nung anenzüka lir, ta district kettangsurtemi metetdaksü.

GOVERNMENT OF NAGALAND  
DIRECTORATE OF INFORMATION & PUBLIC RELATIONS  
IPR CITADEL, NEW CAPITAL COMPLEX  
NAGALAND : KOHIMA

NO.DIPR/PRESS-MISC/2018

Dated Kohima the 8<sup>th</sup> August 2023**'MERI MAATI MERA DESH'**

In light of the upcoming 'Meri MaatiMeraDesh' campaign, aimed at fostering a sense of patriotism and environmental responsibility, we are taking significant steps to ensure its success.

**Pledge (PanchPran) in Programmes:** During all events and programs conducted in villages and towns, it is mandatory for participants to take the pledge (panchpran). This pledge involves holding a fistful of soil (mini) as a symbolic representation of our deep connection with our homeland.

**Selfie with Soil and Pledge:** During the pledge ceremony, participants should take a selfie either individually or as a group, holding the fistful of soil while taking the pledge. The selfies must be uploaded to the dedicated website: [https://yuva.gov.in/meri\\_maati\\_mera\\_desh](https://yuva.gov.in/meri_maati_mera_desh), created by the Government of India.

The villages/towns programmes are proposed to be held between 9th August 2023 and 15th August 2023, the block level and larger urban local bodies/municipalities between 16th August 2023 and 20th August 2023, the State level programmes by 25th August 2023, and the Grand Finale at Kartavya Path, New Delhi on 29th or 30th August 2023.

Issued by DIPR

## China-i Philippines dang mangatetep aliba tzüym nungi rong agintsü ashi

**Beijing, Luroi/August 8 (Agencies):** China indang foreign ministry-i maneni Philippines dang alima rara tanabuba nung amshiba rong (warship), koba Manila-i khen atema military base ama amshidar, iba rong ya mangatetep aliba South China Sea kübok reef ka nungi anintsü ayongzükogo.

Hopa tatemi iba rong nung amenoka aliba sepetem nem tenügdakba oset bener otsüba mapang China indang coastguard-i rong ka dak water cannon khaloktsüba atema Philippines-i China aitsür aliba mapang ka nung asendenshir iba takhangba agütsüogo.

BRP Sierra Madre ya iba tzüym nung China inyaksangshi tejakdangi aoba asadanga atatsü asoshi 1990s tatemlen iba tesem nung amenoka toktsü aser iba tesem ya Manila aser Beijing na mapang talangka nungi mangatetep adoka aruba tesem ka lir.

"China-i maneni Philippine dang Second Thomas Shoal nungi iba rara dang amshiba rong ya tangsa tang agintsü mepeshir," ta China indang foreign ministry-i Mongolbarnü sangdong ka ajanga metetdaksü.

Ministry-isa, China-i Second Thomas Shoal ken o dak sendakba nung diplomatic lenmang ajanga Philippines den aiben tongtepratepogo, saka

tebilemba tajung nung temepeshiba agütsüba ya sentoka tokja arudar.

"Philippine-i reef nung ozüing alema amenoker aliba rara dang amshiba rong ya atsür aotsü ta aiben tenangzükba agütsüogo," ta China indang foreign ministry otongdar kati ashi.

"Küm metsür pezü süiogo saka Philippine-i iba rong atsür maouer saka yanglushitsü atema merangdangogo aser Ren'ai Reef teti atema atsüngtsü asoshi sepaitemang tali yoka inyakyim ajungketshir," ta otongdarisa shisemba den Second Thomas Shoal inang China nungja amshia liasü.

China-i takhangba agütsüba sülen Philippines-i Mongolbarnü telangzüba agütsüogo aser ashiba agi, parnoki Second Thomas Shoal toktsür maotsü.

Philippine National Security Council assistant director general Jonathan Malaya-i Hombarnü sangdong ka ajanga, "Philippines-i Ayungin Shoal nung onok indang post kodanga maitsütsü," ta ashi.

Second Thomas Shoal dang ya Philippines nung Ayungin Shoal ta ajar.

"Onoki China dang water cannons mesüra military-grade lasers amshia ken o tamajungba mekümdaktsütsü mepeshir, koba ajanga Philippines nung lendongbang nung toktsür, saka sensaksem aser tanga diplomatic

inyakyim ajanga ken o bentettsü ayongzükür," ta Malaya-i ashi.

China indang coastguard-i Honibarnü iba rong nung amenoka aliba Philippine nung sepaitem nem chiyongtsü, tsü, totzü aser tanga osettem bener oja aliba rong ka water cannon amshia nokdangtsü merangba sülen Manila-i Hombarnü Beijing indang envoy jaokogo.

China-i hopta tatemi, parnoki Philippine rong ka anema jenang tapet agiogo, koba ozüing alema onok indang tzüym aita liasü, ta ashi aser Hombarnü ashiba agi, parnoki kanga azüzüka inyaksangshio.

Second Thomas Shoal ya Philippines indang asetkong Palawan nungi km 200 shi pilar lir aser China indang anasatiba asetkong Hainan nungi km 1000 dak tema pilar lir.

China indang coastguard aser navy rongtemi iba mangatetep adoker aliba tzüym nung senzüa aliba Philippines nung indang rongtem mapang shia nokdanga arudar aser Hombarnü parnoki Manila dang shoal-i rong mesüra iba rara dang amshiba rong yanglushitsü atema mesüra sepa tali meyoxtsü metetdaksüogo.

China-i South China Sea nung tesem timba ka parnok meyong ta shia arudar aser iba ajanga Malaysia, Vietnam, Brunei, Taiwan aser Philippines den tzüym dak sendakba nung aiben mangatetep adoka arudar.

## US ketdangsüri Niger mitkar den senden amen

**Niamey, Luroi/August 08 (Agencies):** Taoba ita mitkar tashi amshia yimten atsüngdokba sülen US ketdangsür kati Niger mitkar lenirtem den tejak jitepa jembishinü aka.

Acting Deputy Secretary of State Victoria Nuland-i temolung ajak rakpoka jembi aser kasa mapang kanga tasak liasü, ta ashi.

Mitkar temi sorkar atsüngdokba ya yimya tajunglen nungi tatem kati arutettsü aser Tir Mohamed Bazoum tanaben tir inyaktaktsütsüla, ta Washington-i ashi saka kasa mapang teyari agütsübabo anena lir.

West African linüktem Brestibarnü ajurutepa iba tebilemstü jembitsü lir.

West Africa linük 15 agi kumteta 'trading bloc' ECOWAS

ajanga Niger mitkar lenirtem dang Deobarnü 23:00 (GMT) ako tashinung election ajanga shimba tir nem tashi meyipa agüjang, ta mapang sükkükja liasü.

Saka mitkar lenirtemi meyiper iba bloc ajanga mitkar tsütsü timtem agütsütsü ta langzükba Niger indang airspace shibang.

Niger yimtiba Niamey nungi osangbener den jembidang, ghonda ana dak tali jembishinüba mapang constitution yimya dangi meyiotsü tejangraba lira US-i yaritsü molunga lir ta maongka agütsü, ta Nuland-i ashi.

Nuland-i military chief of staff tasenba Brigadier General Moussa Salaou Barmou den ajurutep saka Niger nung lenir tasenba ta sangdonga alisang General Abdourahamane Tchiani

mesüra Bazoum denbo majurutep, ta ashi.

Bazoum ya tang tashi tepuokdak lir saka taoba mapang pai US ketdangsürtem den phone ajanga jembia liasü.

Linük azüoktsü asoshi Russia indang Wagner mercenary group dang teyari meshiba asoshia khuret aser tebilemstü lemsatepogo, ta Nuland-i ashi.

"Wagner jaokdang yangi pei temeden lendong nung lir ta iba mera agirtemi kanga junga angateta lir," ta lai ashi.

Taoba mapang Bazoum indang presidential guard tekolak inyaka alisang Gen Tchiani-i July 26 nü yimten tashi rakzük aser Niger tesama tia nungi paidokner ta shia liasü.

(Maneni tapak 8 nung...)

## Pelaba Lemsateper



Asür Karinungla Mangmetong

Temeim ojala Karinungla August 4, 2023 anogo nung iba akümüli wadang temer asen teyanglur Tsüngremi anir ogo. Iba mapang ozü dak malangba temeim sayua onok mangyim jashi nung alidang shirnokisa rongsen, shisatsü, nübu aser sarasadem agi yaria onok mangyim jashi lemsatepogo, ajak dangi tsüngdong arua pelaba melemsatepteter, saka iba osang kaket ajanga nenok ajak dang pelaba lemsateper. Temoatsür Tsüngremi nenok mapa tajung asoshi moajangma.

~ Temeim Kinungtsü aser Chirnurtem.

### OFFICE OF THE DIMAPUR LONGPA SENSO TELONGJEM DIMAPUR: 797112 : NAGALAND

**SANGDONGER**

Longpa senso, asür Mokokchiba jabaso, Wb. **M.Chubalepden-i** ozüing alema aser sobaliba den mapet maparen inyakba ken o nung ajemdaker Dimapur Longpa Senso Telongjem (DLST) tep-i arutsü asoshi Nagaland Post osangkaket 7th July, 1999 nü sangdong. Ajsüaka, pai iba sangdong züdoka yutsü.

Tanü-a pai ozüing alema Dimapur nung maparen balala inyaksa-a jajaba osang angazük nung pa ya DLST züngsem ka masü, anungji shirnoki pa den tsütatepa shishilembatepter pei khuret asütsü. Wb. **Chubalepden** den sentakba ken o nung DLST kecha shilem mali ta sangdonger.

Sd/-  
**K. Mar Lemtur**  
Tir, DLST

Sd/-  
**Akok Ozüküm**  
Tongti Zülur, DLST

### GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA NO.DHFW-21/FSSA/Workplan(MoU)/HR(FSW)/28/2022-23/ 2027 Dated: Kohima the 8th Aug 2023

**ADDENDUM**

With reference to this office advertisement NO.DHFW-21/FSSA/Workplan(MoU)/HR(FSW)/28/2022-23/2024 dated 3rd Aug'2023, published in local dailies dated 5th Aug'2023, the qualifications mentioned below are applicable for the Food Technician Walk-in-Interview scheduled for 10/08/2023 at 11:00 AM, IDSP Conference Hall, DHFW, Kohima:

i. Holds a Bachelor's/Master's/Doctorate Degree in Chemistry/ Biochemistry/ Microbiology/ Dairy Chemistry/ Agriculture Science/ Fisheries Science/ Biotechnology/ Food Safety/ Food Technology/ Food & Nutrition/ Dairy Technology/ Oil Technology/ Veterinary Sciences from a University Established in India by Law.

**Note:** Reporting Time 10:00 AM, Candidates who arrive after 11:00 AM will not be allowed to sit for the interview.

Sd/-  
**(DR.VIBITUONUO M. SACHU)**  
Principal Direction & Addl. Food Safety Commissioner  
Directorate of Health & Family Welfare  
Nagaland : Kohima

**SANGDONGER**

Akhoya nung Late Rongsennungba jabaso Alemtemjen-er jala Mrs. Kimazüngla 31-07-2023 anogo tashi la kinungbo den külemi lia atsüba sentsü onoki memetet. Ano kinungboi la palazüka toktsüba anogo nungsa kinungeri la jendoker. Anungji la den inyaktepba kecha kinungeri memetet.

Sd/-  
1) Imsütoshi  
2) Olemjungba  
3) Temjenmenba

## World Cup: Colombia aser France na quarter-i iogo



Jamaica den asaya nung Colombia tsür Catalina Usme (teyong) lar team asoshi goal ka idaktsüba noksa nung angur.

**Luroi/August 8, 2023 (Agencies):** Mongolbarnü Tetsür World Cup asaya round of 16 nung Colombia-i goal 1-0 agi Jamaica madak takok ngua tang mezüngbuba quarterfinals-i iogo.

Asaya nung goal ka ya Ana Guzman-i long pass ka agütsüba Usme-i kanga junga agizüka minute 52buba nung idakja liasü. Usme-i iba goal midaktsü tsüngda Jamaica team iba asayamung nung goal ka danga chia maliasü.

Colombia team Honibarnü quarterfinals nung European champion England den Sydney

kübok Stadium Australia nung asayatsü.

Colombia team tang agi tasembenbuba World Cup nung asayar aser 2015 küma parnok round of 16 tonga asayaogo, ajisüaka United States goal 2-0 agi mekoki liasü.

Kasa mapang nung Jamaica team tang agi tanabenbuba world cup nung asayar aser taküm mezüngbuba knockout round tongteta liasü.

Kasa asayamung tanga asaya ka nung France-i goal 4-0 agi Morocco madak takok ngua quarter-i iogo aser parnok

quarterfinal nung asayamung ayongba linük Australia den asayatsü.

Herve Renard-i aniba team ya taküm agi World Cup pezübuba atonga quarter final atema qualify süogo.

Asaya nung Kadidiatou Diani-i France atema mezüngbuba goal ya minute 12buba nung idaktsü. La den yarisea Kenza Dali-i minute 20buba nung tanabuba goal idaktsü aser Eugenie Lo Sommer-i minute 23 aser 70buba nung goal ana idakja parnoki iba asaya goal 4-0 agi ayong ayonga kokogo.

## Neeraj-i anir India nunger WAC asayatsü



**Luroi/August 8, 2023 (Agencies):** Olympic nung javelin throw nung gold medal ngur alisang Neeraj Chopra-i anir India nunger asayartem World Athletics Championships nung asayatsü. Iba asayamung ya Budapest, Hungary nung August 19 nungi tenzüka asayatsü.

Iba asayamung nung linük tenüng nungi asayatsü asoshi asayar 28 shimogo.

Mimlai iba osang ya Athletics Federation of India (AFI)-i masü saka Sports Ministry-i sangdonga liasü.

Shot putt nung Asian record bener alisang Tajinderpal Singh Toor, iba asayamung nung shilem magitetsü, kechiyong pa

July ita Asian Championships asayaba mapang yiruba tang tashi taneptsü junga minguteti lir.

Kasa mapang nung high jump asaya nung national record bener alisang Tejaswin Shankar, 800m runner K M Chanda aser 20km race walker Priyanka Goswami (national record bener alir) nungeri Hangzhou, China nung asayatsü aliba Asian Games (September 23 nungi October 8) dak rangloker inyaksangshitsü atema World Championships nung shilem magitsü telemtetba agiogo.

Diamond League champion Chopra-i 2022 küm iba asayamung Eugene, USA nung asayaba mapang silver medal ka anguba sülen taküm

Budapest nunga gold medal angutsü imlar.

### Team yamai alitsü:

**Tetsür:** Jyothi Yarraji (100m Hurdles), Parul Chaudhary (3000m Steeplechase), Shaile Singh (Long Jump), Annu Rani (Javelin Throw), Bhawna Jat (20km Race Walk).

**Tebur:** Krishan Kumar (800m), Ajay Kumar Saroj (1500m), Santhosh Kumar Tamilarnsan (400m Hurdles), Avinash Mukund Sable (3000m Steeplechase), Sarvesh Anil Kushare (High Jump), Jeswin Aldrin (Long Jump), M Sreeshankar (Long Jump), Praveen Chithravel (Triple Jump), Abdulla Aboobacker (Triple Jump), Eldhose Paul (Triple Jump), Neeraj Chopra (Javelin Throw), DP Manu (Javelin Throw), Kishore Kumar Jena (Javelin Throw), Akashdeep Singh (20km Race Walk), Vikash Singh (20km Race Walk), Paramjeet Singh (20km Race Walk), Ram Baboo (35km Race Walk), Amoj Jacob, Muhammed Ajmal, Muhammed Anas, Rajesh Ramesh, Anil Rajalingam, Mijo Chacko Kurian (Men's 4x400m Relay).

## 2nd Mkg Inter-ward volleyball tournament tanü nungi asayatsü

**Mokokchung, Luroi/August 8 (TYO):** "Forging Champions" omen dak rangloker 2nd Inter-Ward volleyball tournament tenzüka sentong Aug 9 nü Multi-Purpose Sports Complex, Mokokchung nung akatsü sentong renema lir. Iba sentong nung MLA & Advisor, Transport and Technical Education, Temjenmenba tetushi tesemdanger asütsü jaoka lir.

Taküm iba sentong nung Mokokchung town kübok ward 9-i shilem agitsüba lir. Pool 'A' nung - Sungkomen,

Mongsenbai, Alempang, Lijaba Lijen aser Artang Ward-tem lir. Pool 'B' nung - Majakong, Penli, Yimyu aser Kumlong ward-tem lir. Iba asayamung ya Aug 11 tashi asayatsü.

Iba asayamung shir ward-i temaba jenjang bendir senpet sen 30,000/- aser tatong nem 20,000/-agütsütsü. Iba den nija senpet Best Setter, Best Spiker aser Player of the tournament shima senpettsütsü tayongertem terenemba lir. Iba asayamung ya Mokokchung District Volleyball Association aküm nung Kumlong Sporting Association-i ayongzüka akar.

## BWF rankings: PV Sindhu jenjang ana tejakdangi tuogo

**Luroi/August 8, 2023 (Agencies):** Olympic nung medal ana tashi ngur alila PV Sindhu, Mongolbarnü sayaba BWF World rankings nung jenjang ana tejakdangi tua tang 15buba nung lir.

Ajisüaka tebur kija asaya nung Kidambi Srikanth bo asepzükalua tang 20buba nung lir.

Taküm junga masayateti aruaka Sindhu-i kanga meranga asayar Australian Open nung quarterfinals tonga asayaogo, kong la USA tsür Beiwen Zhang-i tsükdakja liasü.

Kasa mapang nung Srikanth-a Australian Open nung quarterfinals nung tsüka liasü. Pa külem India nunger asayar Priyanshu Rajawat-i tsükdaktsü.

HS Prannoy, shiba Australian Open nung tanabuba jenjang nung tembanga liasü pa

maneni jenjang 9buba aser Lakshya Sen-a masetshi-i jenjang 11buba nung lir.

Priyanshu Rajawat-i taoba hopta tembangba Australian Open nung kanga junga asayaba sülen pa jenjang asem tejakdangi tua tang 28buba nung lir, koba pa asoshi tang tashi nung jenjang tajungtiba asütsü.

Maneni India nunger asayartem rongnungi Mithun Manjunath aser Kiran George nata jenjang tenet aser trok ta tejakdangi tua tang 43 aser 49buba nung lir.

Tebur tarep asaya nung Satwiksairaj Rankireddy aser Chirag Shetty na maneni tanabuba jenjang nung lir.

Ajisüaka tetsür tarep asaya nung Treesa Jolly aser Gayatri Gopichand na jenjang ana asepzüka lua tang 19buba nung lir.

## US ketdangsüri Niger...

(Tapak 7 nungi...)

Sahel region nung tensa tamajungba akumba ajanga taoba mapang iba linük nung yimsü süa aliba France-ia Hombarü par senso dang iba region-i maotsü ashi.

"Senzüsempongba ajemtsü, lokti adenshiba nungi pila alitsü aser tensa indang teti osangtsüsang agiteptsü kanga tongtipang,' ta foreign ministry ajanga sangdong ka nung ashi.

ECOWAS nungi mitkar tekolakpur temi sepai tashi amshitsü sentong tejangja yangluogo ta osang angashiba sülen "foreign power" temi linük amaktsü renemer ta osang angazüka lir, ta Niger nung aliba mitkar lenirtemi Deobarnü shia liasü.

ECOWAS indang Commissioner for Political Affairs, Peace and Security, Abdel-Fatau Musah-ia teka amuoaktsü asoshi mera ajunga

asadangogo saka tajunglen nungi ang inyakner, ta shia liasü.

ECOWAS ajanga tenokdangba agüja pangzüng yangluba aser mitkar tashi amshitsü akok ta angazüka Nigeria Tir Bola Tinubu-i Nigeria Senate dangi züluba ama hopta tatemlen Niger tensa indang jembia liasü.

Mitkar tashi amshitsü ya Nigeria nungeri memolunger saka Tir Tinubu-ibo Niger mitkar dang yimten tashi yutsütsü aser yamaji meinyakra mitkar tashi amshitsü ta amokmerena liasü, saka iba mera agitsü atema National Assembly nungi temelaba agitsüla.

Ajisüaka Niger mitkar lenirtemi tashi meyipa agütsütsü molunga aliba kecha majiteter aser Deobarnüa parnok bukumer nisung meyrirjang aika Niamey nung adenshia liasü.

## BILEMDANGANG

"Temeim medeni taochi sayutsü tasak."